

**Unga siunnersuut: Naalakkersuinikkut sulinermut aningaasatigut tapiissuteqartarneq pillugu inatsisartut inatsisaata allanngortinnejarnera pillugu Inatsisartut inatsisaat nr. x, xx 2015-imeersoq (UPA2015/149).**

**Unga siunnersuut: Inatsisartuni Naalakkersuisunilu il. il. ilaasortanut akissarsiaqartitsisarneq il. il. pillugit Inatsisartut inatsisaata allanngortinnejarnera pillugu Inatsisartut inatsisaat nr. x, xx 2015-imeersoq (UPA2015/150)**

(Siunnersuutit tamarmik Inatsisartut Siulittaasoqfiannit saqqummiunneqarput)

### **Akissuteqaat**

(Naalakkersuisut Siulittaasuut)

### **Aappassaaneerneqarnera**

Aallarniutigalugu partiinut tapiissuteqartarnermut inatsisip aamma akissarsiaqartitsinermut inatsisip allanngortinnissaannut Siulittaasoqfiup siunnersuutanut Inatsisinut Ataatsimiitaliap isumaliutissiissutaanut Naalakkersuisut qujassuteqarput. Siunnersutigineqartut taamaattuuneri pissutaallutik Naalakkersuisut siunnersuutit aappassaaneerneqarnissaannut ikittuinnarnik oqaaseqaatissaqarput.

Naalakkersuisut maluginiarpaat massakkut Inatsisartut suliarisaat immikkoortoq 148 Inatsisartut suleriaasiata allanngortinnissaanut tunngassuteqartoq inatsisinik allanngortitassanut siunnersutigineqartut peqatigalugit suliarineqassanngimmat, tassami siunnersuutit pingasuusut imminnut qanittunnguummata.

Aammattaaq Naalakkersuisut siusinnerusukkut maluginiarsimavaat partiinut Inatsisartullu gruppiini ilaasortanullu allanut kinguneqartitsisarnissaq pillugu siunnersuuteqartoqarnernera, tamatumani Inatsisartuni ilaasortaq allanik suliaqarnerminut aningaasatigullu soqtigisaminut paasissutissanik tunniussinissamut piumasarineqartunik eqqortitsisinnaanngippat. Taamaakkaluartoq Inatsisinut Ataatsimiitaliap isumaliutissiissutaani takuneqarsinnaavoq siunnersutigineqartumut inassuteqaammut Inatsisinut Ataatsimiitaliaq isumaqataasoq.

Naalakkersuisuttaaq Siulittaasoqfiup siunnersuutanut arlalitsigut ernumassuteqarlutik oqaatigisarsimavaat qanoq isilluni siunnersutigineqartut atuuttussanngorlugit piviusunngortinneqarsinnaanersut. Kisiannili Siulittaasoqfiup siunnersuutaani sammineqartut tamakkerlutik Inatsisinut Ataatsimiitaliaami suliarilluarneqareersimammata Naalakkersuisut sinnerlugit oqaatigiinnassavara ataatsimiitaliap isumaliutissiissutaani inassutigineqartut Naalakkersuisut tusaatissatut tigummatigit.